

Za Velida Hamidičevića zatražene mjere zabrane

Tužilac Tužilaštva BiH uputio je prema Sudu BiH prijedlog za određivanje mjera zabrane za Velida Hamidičevića (1957), iz Sarajeva, državljanina BiH, službenika Ministarstva vanjskih poslova BiH, koji je osumnjičen za krivično djelo organizirani kriminal u vezi sa krivičnim djelima trgovina ljudima, primanje dara i drugih oblika koristi, zloupotreba položaja ili ovlaštenja, krivotvorenje službene isprave iz KZ-a BiH, saopćeno je iz Tužilaštva BiH.



Savjetnik za konzularne poslove u Ambasadi u Parizu, Francuska, Velid Hamidičević, osumnjičen je da je, zloupotrijebivši službeni položaj i ovlaštenje, omogućavao većem broju lica da dobiju odgovarajuća dokumenta za putovanje iz Francuske u BiH, iako ne posjeduju državljanstvo BiH ili im je važeća putna isprava oduzeta od strane policije R Francuske prilikom lišenja slobode zbog izvršenja džepnih krađa na području grada Pariza i šire. Prijedlog za određivanje mjera zabrane upućen je Sudu BiH.

Ministar vanjskih poslova Igor Crnadak na jučerašnjoj konferenciji za medije rekao je da je dobio usmeno obavještenje o hapšenju jednog uposlenika Ministarstva vanjskih poslova BiH u akciji kodnog naziva CD.

- Danas želim da kažem da najveći broj naših diplomata i državnih službenika radi svoj posao vrlo časno i pošteno. Svi pojedinačni slučajevi korupcije i zloupotrebe moraju biti i bit će sankcionisani. MVP neće tolerisati ni najmanji oblik korupcije, a kamoli krivična djela kao što se radi u ovom slučaju, rekao je Crnadak. Prema njegovim informacijama, službenik Ambasade BiH u Parizu počinio je više krivičnih djela u vezi sa nezakonitim izdavanjem putnih isprava i omogućavanje boravka pojedinim osobama u Francuskoj.

Crnadak je rekao da će, nakon što bude i zvanično obaviješten od Tužilaštva BiH, započeti proceduru suspenzije. Ministar nije mogao govoriti o imenu osobe koja je uhapšena, saopćeno je iz MVP-a.

U nastavku aktivnosti u okviru predmeta kodnog naziva CD, policijski službenici Državne agencije za istrage i zaštitu (SIPA) pretresali su jučer službene prostorije Ambasade BiH u Parizu koje koristi osumnjičena osoba, uposlenik Ambasade BiH, kojeg su u četvrtak uhapsili pripadnici SIPA na području Sarajeva. Navedene aktivnosti rezultat su višemjesečnog rada zajedničkog istražnog tima u čiji rad su uključeni istražitelji SIPA i Odjela za maloljetnike Policijske prefektуре Pariza, te predstavnici Tužilaštva BiH i Tužilaštva Francuske, saopćeno je iz SIPA.